

1898年

第

卷

第

69

期

時務報

七月初一起
改名言報

第六十九册

國立北平圖書館藏

時務報

光緒二十四年六月三十一日 第六十九册

論西人處置東亞之意 論宜令全國講求武

事 諭旨 公牘 中國鐵路總公司續訂借款合同

又續訂借款詳細合同 英文譯編 中國時務

中國鐵路 論中國宜重視海軍 續英 外國時

務 論中俄日三國時局 論歐洲各國交涉情形

俄人經營旅順口 俄人與辦屯墾 日 中外電

音 中緬暹三國交界圖 法文譯編 西伯利亞

鐵路 英人熟籌在中國之商務 論英法水師之

優劣 附編 長生術 法國賽會物件分類名目

各國寶星攷畧

本館告白 啓者敝報現已半年
期滿所有本埠外埠閱報諸君如
未付報資者即祈將報資惠交本
館或代派處其只付半年報資者
如願續行定閱亦祈到本館及代
派處付資掛號是爲至要特此奉
告尙祈鑒之

價價表 外埠概
不零售

每一册 洋一角五分
每年三十三册 洋四元
閏月加三册 洋四角

外埠每册另加寄費表

直隸 山東 河南 洋二分
四川 廣西 外國 洋四分
陝西 貴州 洋四分
甘肅 雲南 洋六分

此外各埠 不加寄費

其餘書籍 亦無寄費

本館之報無論遠近均係按
期寄出如屆時不到暨有遲
誤短缺等事均祈從速專函
示知以便追究此啓

各兼外埠均請在本館代派處定購
 地本在請均埠外
 派館本在請均埠外
 報自地
 處印派代
 所書印派代
 籍購定處

瓊瑤廠廠甸總報局 保定清苑縣署內 蓮池書院 史家故址庵存厚堂 天津開
 口風神廟左首恬佑祠內時務報分館 關口風神廟內西學官書局 鍋店街文美齋書坊 太谷
 鳳山書院杜允明 開國嶽學門路北陳公館 廣武陟縣右堂杜 西安城隍廟西首聚
 賢齋石印書坊 務本新報館 味經書院 蘭州電報局 聚賢齋書坊 大理礦務局
 閬陽長春巷府尹第李宅 成都鹽道署內楊 果子園官保第楊宅 志古堂書坊 重慶
 渝報館 白象街怡和行 武昌府前街時務報分館 漢口黃陂街乙海春戒烟藥房 黃
 陂街打扣巷江左漢記 宜昌二架牌坊江左漢記分局 沙市七里廟巷江左漢記分局 黃
 長沙礦務總局 常德南門外乙海春戒烟藥房 南昌桂旺廠汪公館內 羅祖廟前經濟
 學堂內汪 九江福康輪船公司 安慶藩經廳署內 電報局 姚家口江友馥 廬山
 更樓東羅公館 清善後局 河北海神廟西巷內程公館 揚州電報局 秦州北門外
 儲家巷周宅 徐州府經廩 蘇州護龍街墨林堂書坊 婁門內丁香巷吳宅 常縣醉尉
 街內閣第張 豐山振記莊 常州龍城書院 江陰永恆義 杭州九曲巷樓宅 嘉興電報局
 轉寄處大開口鹽店巷吳寓 太倉西門內六加坊汪宅 杭州九曲巷樓宅 嘉興電報局
 硤石萃古齋 湖州油車巷邱宅 甯波諸衙街餘俗鹽局 紹興水澄橋墨潤堂書坊 建甯電報局
 溫州大街時務書局 瑞安卓忠毅公祠內學計館 泉州府城南門外閩海關科房 靖海門外鴻安棧 佛山舊
 福州城內三牧坊楊宅 知新書局 義一齋書坊 聖教書樓 保安局黃 城內煥文閣書坊 汕頭雙
 檳榔街百元堂 潮城內上東堤廣聚棧 廈門知新報館 香港上環恆順泰 日本東京
 和市廣福齋 均同茂泰 海傍鴻安棧 聚珍書樓 廈門鴻發棧 嶺南棧 順泰文
 武直街文裕堂書坊 精神社 神戶 均同茂泰

論西人處置東亞之意

鐵塘汪康年撰

嗚天下之用力少立名美得利豐孰有如今日之西人者乎夫以歐洲諸國積數千年角智積強以逮今日其與吾畫境自守之中國相較豈非若石之壓卵歟豈非若湯之沃雪歟然而彼不遽逞志於中國者或以爲皆由眾強不協之故顧不盡然也彼以爲中國地大而風氣不齊易於攻取而難於居守若一時強取之徒費經營而先失商務之利又以爲用堅船快礮以滅人國而殺人眾糜財多喪船械無算非上策也彼之蓄志以謀中國者舊矣商務以疲之機巧以淫之中國之淺見者咸曰西人必不利吾土地也我以商利啗之足矣然而今日則已明言欲土地矣德佔膠州而山東隨之俄佔旅大而東三省隨之法築龍州鐵路而廣西隨之英則據威海衛矣法又佔廣州灣矣英又租九龍矣凡吾海口要害皆已分以爲己盤踞之地於是完固海口以漸收內地強者斃之弱者撫之無幾時而中國之權利一切歸其掌握矣彼又以爲用力服人而殘殺太甚得大詬於世者則民心必不服不服則不能久是故彼要求於中國一則曰求保商務而已再則曰求均權而已是以彼之聚謀以圖中國也有其事無其形有其形無其名是以數月之內中國連失數省之地而官紳士民猶惘惘若不甚知也待其知之則固已形勢大定不可搖動矣彼又慮我民

氣驟動不可遏抑也。故收我國權而猶力扶我君權。則民間有抵觸而起者。中國必自能滅之。中國卽不能自滅之。彼亦必代爲滅之。彼非爲我除亂民也。彼實去抗拒彼之人也。如此則凡吾方圖自存之赤子。皆爲犯上作亂之人矣。彼又慮我奮激之言。足以動衆聽也。彼明言曰。瓜分之議。西人並無是言。彼華人好事之徒造之。以激人叛其國也。以使人怨怒吾西人也。如此則凡吾大聲疾呼之言。皆爲召亂啟釁之辭矣。如是則中國義士箝口。義民束手。彼將可安坐而收其地矣。若夫用中國之兵力以爲彼除害。用中國之財力以爲彼築路。則尤爲巧便之甚者。夫使天道失循環之理。吾華無萌蘖之機。則西人之處心設慮。豈不足計日而償哉。

夫以中國之孱也。黃種諸國之離而未羣也。彼西人苟欲肆其鯨鯢之心。庸詎不鑿其願。然試思通商以來。西人之吮脂潤膏於我亞東者。幾何年矣。則近百年來各西國所以商利不絕。互相灌注者。豈不惟我是賴。今乃乘我武備未修。國勢未張之時。攘奪無忌。賊殺不厭。抑思地球諸國。一興一仆。何常之有。若不務相存而惟求獨雄。一思以威猛慘虐行之。彼蒼者天。方將哀我仁柔。而怒彼殘賊。譬彼懦夫。被諸無賴之擾。懦夫則束手矣。然而控諸刑官。則彼諸無賴者。皆將貫索而被重責矣。吾恐彼上帝者。亦將赫然而爲各國之刑官也。

論宜令全國講求武事

錢塘汪康年撰

嗚呼我中國四萬萬人民其遂安然奴役於異種之人乎嗚呼我中國四萬萬人民其猶不甘心奴役於異種之人乎意不欲也以爲無術是謂愚知其可也然而聽之是謂忍以中國之右文輕武上下相與嬉酣沉溺於太平之中民皆柔靡脆奕惡死畏兵前年東事起命貴族爲將則親友慰問家屬相持而泣都中徵兵則哭不肯行涕泗橫頤者比比也閭巷之中聞兵事則駭而逃爆竹震於鄰則壯夫掩耳稚子疾走東南諸省至以子弟乘騎爲詬病其不嫻彎弓橫刀更無論矣而流俗又甚賤武人文武甲第相若而不相交也對品之官文武懸絕如天壤武職六品至爲文職扶輿而提鎮以下官苟無職任或不免笞杖馳驛之吏廝役之賤多敘以武職夫民俗之脆如彼國家之賤武又如此是故民固不敢習武卽習之抑又無功夫國家所至之境界實全國人心所結撰也心注於強則強心注於巧則巧心注於弱拙則弱拙心注於衰亂則衰亂是故爲國家者莫慎乎驅人心之所注也今諭旨固已言民團矣今宜明詔天下曰自今以後我君臣上下其悉惟武是事官以武爲尙任以武爲重學以武爲貴業以武爲美其不能武事及臨鬪而避者爲上恥禮記曰戰陳無勇非孝也又死而不弔者三畏爲其首日本此義以激勵其民不數年後民氣日奮

士耽於武人皆能騎戶知執鎗徵兵有兵選將得將當戰能死不戰能避繪圖有人造械有人築壘掘濠有人有不翕然翔起而爲尙武之國者歟今吾俗方畏死特甚抑知避死必死不避死未必死忘死亦必死趨死必不死則試且踴躍淬厲與諸虎狼併命於一旦也

今國家宜速甄定水陸員弁相統率之制兵者全國之血脉也血脉須臾不相灌注即死今兵部無管轄徵調之權而京中諸武職又全不與各省相關各省又各不相關海軍水師則南北洋不相呼應外海內江又不相聯屬又水陸軍多駐守一處而無巡游各處之法是以兵事一起其調遣無一定之程度其統率無一定之權限臨事之人任事難而諉避易功未得賞罪未得罰者比比也今宜全仿泰西之制設水陸提督各一人統率全國軍務其設官駐守巡行之制一切參酌泰西及日本之法而盡易曩日之制則事權畫一責任有歸而不至如昔時之疲敝矣

語詳下期報中所載蔣維喬重

籌海篇茲不贅述

今宜漸更募兵之制而爲民兵也夫募兵權法也民兵常法也募兵之法似簡易而實不勝其弊其極則至民仇視兵兵漠視民且兵起則增募兵罷則散而爲盜曩事固歷歷可徵也又欲變弱國而爲強國非悉一國之民爲兵不可蓋悉民爲兵則民

知以國爲事聞國之被侮則全國之民知恥聞敵之橫暴則全國之民知怒故欲用民心莫善於改民兵今中國用募兵千餘年雖不能遽改然宜以漸易之先行之風氣強悍之地而後及其餘先徵編氓而後及士流其應徵而不願徵者則令呈繳免金數年之後以漸改正如此則民氣日強民志日固矣

今宜令民間速自籌辦民團以輔國家兵力之不足宜仿向來民團之制而變通之畧如西國預備後備兵之法蓋向來民團之法縣自爲團鄉自爲團力分則薄分敵則爭勢散則亂統於縣則無權無所統則易橫向來民團之害多利少大率由此今縱不能合各省爲一團亦宜并一省爲一團宜令民間舉公正任事之人主其事約先募千人而具二千人之服械選鄉間誠樸之人充之名曰額內團兵延教習教以西人行陣之法其未入選而自願按時赴習者則以其餘服械使與額內兵一齊操練名曰額外團兵一俟練成則皆次第之而給以賞牌因遣去額內兵之半而以額外兵補之復添募人以補額外兵之缺其人皆取之本省其兵雖隨散隨添而仍周行於各府之中其已散之人仍令每年赴操一次其月餉極重約每月十兩而留其半存之銀行每年赴操時則與以一年之息並給以赴操之餉死則令其繳獎牌而還其所存之銀凡一次無故不赴操則扣其存銀之半二次則盡罰去之若因事徵調不

至亦盡罰之。凡兵入選時，皆令留影相。凡有兵事來應募者，則以獎牌並勘影相爲憑。如此則不數年而全省之民，可漸變爲強武矣。

今宜准士林設立聯武會以習武事也。中國非無強悍之俗，然往往在民而不在士，尤不在紳富。故宜令立會與民間一體操練，選其尤者，令得充出洋武備學生。會中另備關涉武事之圖書器械，令在會諸人得以展閱。又令各省府州縣互相聯屬，庶聲氣相通而無隔礙之慮矣。

今宜設獎武會以聯絡民間技勇之人也。凡風氣強悍之地，所在皆有專門技勇。然向來與官兵不通，棄之則可惜，絕之又可慮。宜設會以聯絡之，其會即在聯武會之中。藉此以規知魁偉傑特之士，既可知彼施用之所宜，復可知彼出入之所在。於振刷民氣，聯絡民情，實爲至要。

今宜設小製造廠以製快式槍礮，並令人學習製造之法。今宜設繪圖局以審知當地形勢。今宜設工兵學堂以供工程隊之用。是二者獲效雖緩，然實不可不辦之事。宜以次行之。三五年後，亦可以奏績矣。

地球諸國未有文弱如中國者。今日種種被侮，實由上下疲弱所致。然則急要之圖，惟在此矣。竊不自揣，撰成斯論，前二段須俟國家爲之，後四事則紳士可勉爲也。民團一事，法簡而尚易辦，尤爲要圖。若謂教習難得，則自強軍及各學堂中，有可選延者，否則延之日本，亦尚不難。各省官紳有俯探斯言者乎？不勝朝夕企之。

諭旨恭錄

五月初十日奉 上諭恩澤等奏大員在任積勞病故懇恩賜卹一摺呼倫貝爾副

都統烏善早歲從戎隨勦山東河南安徽江蘇湖北吉林等省疊著戰功迨授任副

都統以來於辦理邊防諸務亦能悉合機宜烏善著加恩照軍營立功後積勞病故

例從優議卹該部知道欽此○又奉 旨呼倫貝爾副都統著伊星阿補授欽此○

十一日奉 上諭前因京師入夏以來雨澤稀少朕迭次親詣 大高殿拈香並派

貝勒載濂等分詣 時應宮等處拈香仰荷 昊慈眷佑渥沛甘霖朕心實深寅感

允宜敬謹報謝用答 天庥朕於本月十二日親詣 大高殿拈香 時應宮著派

貝勒載濂 昭顯廟著派貝勒載潤 宣仁廟著派貝子溥倫 凝和廟著派輔國

公載瀾同於是日分詣報謝仍冀頻邀 鴻貺甘澍應時以慰農望欽此○又奉

上諭給事中高燮曾奏成都將軍恭壽署理總督與爲將軍時聲名迥異請嚴旨申

飭等語言官職在糾叅自應指明款蹟據實臚陳該給事中旣稱恭壽貪劣顯著吏

治蠹敝物議沸騰當有實蹟可指著高燮曾迅速明白回奏欽此○十二日奉 上

諭御史宋伯魯奏請將經濟歲舉歸併正科並各省生童歲科試迅卽改試策論一

摺前因八股時文積弊太深特諭令改試策論用覘實學惟是掄才大典究以鄉會

兩試爲綱鄉會試既改試策論經濟歲舉亦不外此自應併爲一科考試以免紛歧至生童歲科著各省學政奉到此次諭旨卽行一律改試策論毋庸候至下屆更改將此通諭知之欽此○又奉 上諭李鴻章著稽查欽奉上諭事件處欽此○又奉

旨此案著交劉樹堂督同臬司親提人證卷宗秉公研訊確情按律定擬具奏原告民人馬蓮該部照例解往備質欽此○十三日奉 上諭新科一甲進士三名夏同龢夏壽田俞陞雲業經授職外李穆勳陸懋勳魏家驊姜秉善黃誥傅增湘孟錫珏秦曾潞葉在藻何作猷江志伊潘鴻鼎何元泰施愚蔭桓莊清吉黃大壩梁用弧丁惟魯李福簡華焯朱耀奎吳震春張鴻基伍毓崧于式梭吳功溥曾廣嵩李彝坤何聯恩趙東階易子猷汪明源凌福勳何國澧李端棨管象晉張鳴珂崔肇琳羅琛鄧邦述蔣熊張學智周渤雲祥魏鴻儀蔣炳章阿聯志琮陳驥查秉鈞陳培銀鍾錫璜章際治張履春文斌黃彥鴻董若洵壽富郭恩廣陳汝康潘昌煦袁勵準饒叔光魯爾斌許鄧起樞周維藩牛東藩謝緒璠朱名炤胡濬蔡侗鄧曾護余寶溁黃壽寰范桂萼高桂馨龍煥綸林東郊陳海梅王蘭庭馮紹唐俱著改爲翰林院庶吉士范軾趙汝湧莫沕鉷蔡壽年許汝棻杜德與蔡桐昌張百祺彭泰士薛倓善魏震陳進鉅陸增煒章廷黻張光鼐區家偉何肇勳麥秩嚴周國光楊曾榮王士傑李效曾胡

祥鏗曾瑞棻黃家駿趙傳忍蔡璋任本恕興元歐鏞石光暹楊潤身聶謙吉何廷獻
張美玉程式穀舒榮林耀增張傑徐德炳胡大崇韓肅儉商廷修蕭開甲傅邦翰桂
殿華甯述俞孟廣來郭日章王闕城孫光祖王恩衍陳智偉宋嘉俊丁錫祐陳應濤
盧德復尹家楣王守恂劉景熙慶廉成沂張璧田史悠瑞甯鵬南林鎮荆譚文蔚秦
達章沈似燦文杰梁楷祝嘉聚張梅亭王廷揚李紹烈劉翼經張權唐越森林師望
長春朱運新吳鎧王儀通崔寶仁唐毓麟陳桂芳梁造舟陳斌麟榮煜王世奎俱著
分部學習李華柏廖佩珣陳恩頤方象埜呂慰曾陳湘濤孫卿裕鄭師灼鄭寶謙蔣
玉泉任肇新包源陳綱廉榮于廷琛趙以成俱著以內閣中書用范鐘劉重堪閻鳳
閣楊詠裳盧元樟林景綬榮貴趙恩綸王芹芳陳啓棠李維楨王希賢饒士翹楊沅
盧金書何端樹于鳳閣蘇耀泉蔡世信周應昌王道凝朱映清方雷李如松劉維垣
宜勳范普藩張孚襄于銘訓郝毓椿朱郁春何壽朋樂秀高壽趙耀基李鍾嶽戴光
祖陳柏侯馬楨向步瀛向昌甲陸乃棠胡世昌陳耕三劉煥光李濤朱滄鰲李麟昌
郭顯球任承紀蕭元怡熊廷權王可培張興慧韓桂攀張斯鈺劉肇夏唐景崑吳立
亭羅運松趙延泰張之銓彭鳳沼權尙忠劉麟祥周長清詹照陳維倫李熙陳緯元
馮由吳孝愷劉允亨潘餘慶謝家治傅松齡周震孫占鰲孫其敬黃惠安傅學懋高

煥然王元縱鄭元濬周欽潘紹周計登瀛彭文翰翟鎰陳兆坤張輅張之垣王安定
鄭鍾靈黎效松魏命侯黃鍾杰張鳳藻周榮期陸春官熊光瓚方正應德完楊兆龍
黃錫麟廉瑄葛明遠陳景韶馬振儀吳承彥陳良均屠佩環崇本張綱王熾昌如麟
袁勵端魏鴻勛端木棻徐炳麟程龢朱榮光李德運李剛已劉聲駿俱著交吏部掣
籤分發省分以知縣卽用戶部候補員外郎王廷材著以員外郎卽用刑部候補主
事錢能訓工部候補主事暴翔雲均著以主事卽用內閣卽補侍讀中書朱彭壽仍
著歸原班補用中書趙春年楊廷璣國子監助教崇芳均著以原班用內閣候補中
書龍學泰仍著以中書候補分發江蘇補用知府江忠振著以知府發往江蘇補用
陝西候補知府王世相著以知府發往陝西補用分省補用同知李士麟籤分甘肅
大挑知縣陳易奇湖南大挑知縣魯晉湖北大挑知縣劉漢雲均著以原班用餘著
歸班銓選欽此○十四日奉 硃筆王福祥補授太常寺卿欽此○十五日奉 上
諭軍機大臣會同總理各國事務衙門王大臣奏遵旨籌辦京師大學堂並擬詳細
章程繕單呈覽一摺京師大學堂爲各行省之倡必須規模遠始足以隆觀聽而
育人才現據該王大臣詳擬章程參用泰西學規綱舉目張尙屬周備卽著照所議
辦理派孫家鼐管理大學堂事務辦事各員由該大臣慎選奏派至總教習綜司功

課尤須選擇學賅中外之士奏請簡派其分教習各員亦一體精選中西並用所需興辦經費及常年用款著戶部分別籌撥所有原設官書局及新設之譯書局均著併入大學堂由管學大臣督率辦理此次設立大學堂爲廣育人才講求時務起見該大臣務當督飭該教習等按照奏定課程認真訓迪日起有功用副朝廷振興實學至意該衙門知道單併發欽此○又奉 上諭舉人梁啓超著賞給六品銜辦理譯書局事務欽此○又奉 上諭囑嚮岱慶祺均著開缺來京另候簡用阿勒楚喀副都統著鳳翔補授三姓副都統著保成補授欽此○十六日奉 上諭總理各國事務衙門奏議覆御史曾宗彥奏請振興農學一摺農務爲富國根本亟宜振興各省可耕之土未盡地方者尙多著各督撫督飭各該地方官勸諭紳民兼採中西各法切實興辦不准空言搪塞須知講求農政本古人勞農勸相之意是在地方官隨時維持保護實力奉行如果辦有成效准該督撫奏請獎叙上海近日創設農學會頗開風氣著劉坤一查明該學會章程咨送總理各國事務衙門查核頒行其外洋農務諸書並著各省學堂廣爲編譯以資肄習欽此○又奉 上諭朕欽奉 慈禧端佑康頤昭豫莊誠壽恭欽獻崇熙皇太后懿旨榮祿現已補授直隸總督所有善陀峪萬年吉地工程仍著榮祿會同奕劻辦理欽此○又奉 上諭李安堂著調補

直隸通永鎮總兵正定鎮總兵員缺著藍斯明補授欽此○又奉上諭建設大學堂工程事務著派慶親王奕劻禮部尚書許應騤迅速辦理欽此○又奉上諭總理各國事務衙門奏議覆庶子陳秉和奏山東州縣承辦昭信股票聞有勒派富民恐致輾轉售賣應切實查禁等語昭信股票原期上下流通毋得滋生弊竇該庶子所奏勒派等情恐不止山東一省著各該將軍督撫責成地方官查照部章妥爲辦理不准少有勒索苛派致累閭閻如愚民無知或有轉相抵售以致轉轉滋弊卽著切實查禁毋任吏胥人等藉端騷擾以恤民隱而杜弊端欽此

中國鐵路總公司續訂借款合同

初訂合同見本報第四十六冊

中國鐵路總公司於光緒二十二年九月十四日卽西歷一千八百九十六年十月二十日奉旨設立因承辦盧漢鐵路於光緒二十三年四月二十六日卽西歷一千八百九十七年五月二十七日與比國公司訂立借款合同於武昌比國公司係奉有一千八百九十七年三月初二日國家准憑而設該憑會登是年三月二十二日之官報此合同已於光緒二十三年四月二十四日卽西歷一千八百九十七年五月二十五日奉旨允准卽由總理衙門將奉旨日期照會比國駐京大臣悉知中國督辦鐵路大臣盛因已奉旨允准並接比國駐京大臣電稱德福尼

等有畫押之權。比國公司代辦人比京工部總工程師德福尼、工部頭等工程師比京水利公司總辦愛蘭亦因已奉比國公司允准。按照草合同第十六款所定章程。照前再行畫押。卽爲正合同。現在續訂專條各款如下。

一 比國公司允在中國公司所給費用之內。提出經費。代鐵路總公司估勘測量。盧漢全路工程。並擬繪橋梁屯棧車站機廠一切工程圖式細單。以及應用材料貨色。至於龍頭車輛橫板鋼軌等物。亦一體代爲考訂式樣。但仍須遵照第八款詳擬底稿。呈由督辦大臣核定施行。不得草率遺漏。亦不得另索費用。所有以上事宜。當於合同畫押蓋印齊備後一年內。陸續呈送告竣。且務須迅速勘定軌路。俾於六個月內。卽可動工平地。

二 比國公司允將合同第十二款所載材料酬勞利益刪去。故此款已成無用。

三 比公司因以上兩款之吃虧。且須彌補派人來華之費。印售股票之費。及三十年中經理借款澆裹之費。是以在利息之外。加收四毫。卽每千磅每年加收四磅作爲以上第一

二三款補償一切之費用。此所加之四毫。並與合同第三款所載之四釐利息。一併按期付給。如此利息及一切費用在內。共總合成四釐四毫。別無他費。

四 合同第二款所載應付之款。應兌於比京總銀行。該行名曰協助本國工藝公司。

而中國鐵路總公司則以所收之款匯存於上海中國通商銀行此銀行係於光緒二十二年十月初八日即西歷一千八百九十六年十一月十二日奉旨設立至應還利息本銀應照磅價按次付於上海中國通商銀行

五合同第五款所載鐵路之保是為第一次之保

六此續訂專條應一律由直隸總督部堂蓋印比國駐京大臣蓋印

此專條照繕華文法文各四分均可為據

大清國光緒二十三年六月二十八日

訂於上海

大比國一千八百九十七年七月二十七日

大清國督辦鐵路總公司事務大臣頭品頂戴太常寺少堂盛

大比國合

股

公

司

代

辦

人
愛德福尼

中國鐵路總公司續訂借款詳細合同

一湖廣總督部堂前於光緒二十二年九月十四日即西歷一千八百九十六年十

月二十日欽奉

上諭允准籌借洋款以造京城之盧溝橋至漢口鐵路應由總

理各國事務衙門備文恭錄照會比國駐京大臣

二中國國家責成督辦鐵路大臣盛辦理

三中國鐵路總公司督辦大臣盛及承造中國鐵路之比公司代理人總工程司俞
貝德議定各款如下。

第一款 光緒二十二年九月十四日即西歷一千八百九十六年十月二十日所

奉 上諭另行恭錄附於本合同內中國國家以盧京北漢鐵路約長一千三百准

鐵路總公司承辦該公司原有資本計銀一千三百萬兩中國 大皇帝降旨准

直隸總督督辦鐵路大臣經借款項營造鐵路此道 諭旨在光緒二十二年九

月十四日即西歷一千八百九十六年十月二十日頒發茲敬謹摘敘如下其意

係因直隸湖廣總督會奏遂准設立鐵路總公司一處以造盧漢鐵路並准該公

司籌借洋款以資維繫候補四品京堂盛宣懷派為督辦鐵路大臣等因於是直

隸湖廣總督及督辦鐵路大臣欽遵所奉 上諭定計向外國籌辦五釐借款其

總數係金錢一百十二兆五十萬佛郎克即武昌所訂合同內之四百名曰一千

八百九十八年之 大清國鐵路五釐借款

第二款 此項借款計有板利股票二十二萬五千號每號值金錢五百佛郎克該

股票內應刊之文附錄本合同後票上由直隸總督及督辦鐵路大臣蓋印該股

票等每張以一號至五號為率共需若干屆時由比公司知照承辦之銀行刷印

妥貼其費由比公司認付。每年按照股本給息五釐。其息係以金錢核付。自兌繳股本日起算。每年定西歷九月初一三月初一日給發。首次利息。即以佛郎克核付。

第三款 此項借款自一千九百零九年起分二十年期。由比京總銀行按照本合同附表抽號拔還。抽號應於每年正月之第二個禮拜二日辦理。第一次抽號在一千九百零九年之是日。所有抽出號頭。應刊明於四種日報中。即由比公司出費。

第四款 凡抽出號頭之股票。於每次抽出後。照股票原值。在付利期上。如數以金錢還清股本。該股票所有未到期之息單。不得裁割。應與股票一併繳銷。倘有短缺。則即核計短缺者所值之數。在應還股本內。如數扣除。股本一有拔還之日。即於是日爲始。停止利息。

第五款 在一千九百零七年以前。中國不得增還股本。或全還借款。或核減利息。在一千九百零七年以後。中國總公司。無論何時。可將借款還清。一經全還。所有合同。即時作廢。

第六款 呈繳之息單。及還本之股票。可由比公司隨時知會。在歐洲一處。以佛郎

克付給。比公司當隨後指明經理此項付款事宜之銀行。並經理借款事宜之各銀行。

第七款 此次借款之付給利息。拔還股本。除中國國家原有之事權外。並經中國國家批准在案。言明以給付利息及拔還股本爲先務。故盧漢鐵路之進款。除一切局用及行車各費外。其淨餘者。當留備股票應用。其辦法應載入中國總公司及比公司合同訂妥之行車章程內。該章程與本合同合而爲一。以上辦法。當確切不移。至借款清訖爲止。

第八款 行車後所得進款。除開銷外之淨數。由中國總公司託比公司移交北京總銀行。或該總銀行所派經手之銀行。該銀行即以中國總公司託比公司移交之款。不拘何時兌換金錢。務令中國總公司大得便宜。所兌換者。以足數下半年應付之數爲度。比公司以總公司所託之款。陸續移交北京總銀行。或該總銀行所派經手之銀行。直至彀付下半年應付之數爲度。如此則所有每半年之付款事宜。至少可於三個月前。卽有把握。凡代存此等款項之銀行。務必代爲生息。俾與中國總公司極有裨益。每次付利還本所需款數及其酬費。當先期二十天在比公司移交之款內開支。

第九款 經收存放借款之銀行於造路時不必奉有准諭。可在此項存款中提付利息。

第十款 中國總公司欲於此次借款表其結實可靠之意願將盧漢鐵路之頭等擔保給與該項股票。即該條鐵路及車輛料件行車進款是也。此等擔保當由比公司爲購執股票之人代爲應允。如果中國總公司未能按照合同付利還本。比公司或另有比商接替之公司。因有上文所言鐵路擔保云云。得在上文所指之物業。照顧其一切權利。

第十一款 前條所載與此項借款之擔保。如第七款內云云者。並不相妨。設盧漢鐵路之進款由中國總公司託比公司。於每次利期之三個月前。移交比京總銀行。或該總銀行所派經手之銀行兌換金錢後。不敷應付利息。則中國理應設法彌補。倘有不敷情事。一經該銀行知會中國。應於半年利期之六十日前。按照所需之數。以現款或票據付給比京總銀行。或所派經手之銀行。俾得兌換金錢。湊數付利。

第十二款 比京總銀行。或其所派經手之銀行。應查明先一期付利之數於比公司。或中國所付款內。及時如數提撥。其所託之經手各銀行。備付後一期之利息。

英文譯編

湘鄉曾廣銓譯

中國時務

中國鐵路

夫以中國方里之大，人民之衆，舉辦鐵路，理應早觀厥成，不至遲遲至今，尙無端緒也。本報常謂揚子江一帶，較亞非利加洲所佔，不止一倍，此乃確情。英國商民費如許貲財，在非洲興造鐵路，而在中國鐵路，曾不一言提及。屢議籌款築造鐵路，亦不過徒托空言。滙豐銀行允借鉅款與中國，由山海關築造鐵路，接至牛莊。俄國駐京欽使，以其與俄有關涉，出而阻止，其堅阻情形，與俄德法三國阻日本取遼東無異。俄之立意，蓋欲操縱由彼，藉口於欲得中國無冰口岸，並築鐵路直達該處，遂其所欲。滿洲大局，似已全屬俄國矣。牛莊乃通商口岸，英美商務居其大半，滙豐銀行允借款與中國，築造鐵路至牛莊，免牛莊商務日後爲人占奪，其事甚正，何得藉口阻止。容觀察闕奉旨辦津鎮鐵路，款式全仿美國，德國藉口膠州爲言，以鐵路經過山東省，膠州地屬山東，他國鐵路不得在此經過，致與德人有關涉之處，不知鐵路不經山東，亦可築造。德國有此強橫之舉，各國爲之不平。沙侯知之，亦曾與之理論否乎。沙侯既允德國永遠不在威海衛造鐵路至內地，商務之盛，全在英國通商口

岸他國商民情願在英國口岸貿易不願在德國口岸亞非利加德國屬地商民之貿易者甚少中國商民在威海衛貿易者甚多華人熟見英國旗號咸樂英例之善沙侯不允在威海衛造鐵路不知其意何居九年前張之洞由粵督調任湖督辦理由漢口至蘆溝橋鐵路此路現已由北京築至保定府歸英國工程師包辦緣此人在工次言語每多矜誇他國因不滿意此人漢陽產鐵緩不濟急否則蘆漢鐵路至今亦當告成矣保定至漢口鐵路現由中俄銀行借款出比國名作爲比國籌款此路若成或屬比屬俄屬中屬法須異日方知其詳法人近日議築雲南貴州四川鐵路欲與越南東京聯絡四川因法國教案法人藉詞要挾近有法兵安南兵在滇川邊界駐守將來法人必造鐵路經過雲南四川以達北京與蘆漢鐵路相接德國亦欲在膠州造鐵路至保定府吳淞至南京鐵路則由英商怡和洋行攬造由公龍渡至大理府折至揚子江鐵路或亦歸英商辦理近查得別有一路較此更捷各處鐵路若欲尅日告成須由歐洲各國擔保不歸商辦按現在包辦鐵路章程皆有益於中國商家無利可圖中國築造鐵路在北京應特設鐵路部由各國派人經理其事此舉甚爲有益各國之人可各抒所見擇善而從合籌鉅款爲中國興辦鐵路並可設一專章共資遵守以免紛紛改變朝令夕更此舉雖有益於中國然中國恐難允

行也。

字林西報西七月二十八號

論中國宜重視海軍

英國上議院議員問沙侯曰。前與中國商議。欲將海軍陸兵加意整頓。此事如何。沙侯答云。中國整頓水師。其事易成。前者中國聘請教習武備英員。曾到中國者。極願仍至中國出力。英國之意。亦極欲相助爲理。但不知中國之意若何。不以英國爲越俎否。吾意中國無不願意。然不能以全權付託。事多掣肘。殊難辦理。如中國肯將付以全權。英國自必爲之效力。此舉亦易成事。若中國不允如此辦理。英國亦不值借材異地也。中國如欲振興。除整頓水師陸軍。並無別法。延聘英員。若照從前相待。雖欲整頓。亦恐無權。中國若能信從。以全權相屬。英國必簡派能員。籌畫良策。爲中國精練新軍。中國振興之機。在此一舉矣。中國之兵。照兵籍計之。有一兆人。軍器齊備。可以出戰。每年軍費。計有十兆至二十兆英金鎊。一千八百六十二年。英將戈登助平粵逆之亂。嘗稱中國人多驍勇善戰。若得善將兵者將之。可以轉戰無前。中國海軍。前曾從各國購得頭等鐵甲戰艦巡船。頗稱齊備。海軍在列國中。推爲第六位。自中日開戰後。方知中國海軍全不足恃。有在中國游歷者。見中國政治。紛亂毫無端緒。故整頓海軍陸兵之事。不得視爲緩圖。中國人亦知英國之意。非欲利其土地。若

以俄人論之。滿洲大局。已非復中國所有者矣。

泰晤士報西
六月十八號

續英領事具報沙市商務情形

明時沙市係縣城。現在改爲荊州府屬市鎮。荊州本蜀漢時險要之地。府城在揚子江之陽。相距有一邁半路。規模壯麗。基址堅固。城外深溝環繞。爲荊州府一重鎮。漢人旗人各居其半。生意繁盛。不及沙市。駐防兵俱係旗人。歸荊州將軍管轄。其地多古蹟。古時城址尙存。可想見從前實爲一大都會。沙市距宜昌陸路八十英里。距漢口陸路一百三十五英里。若由水路則較紆曲。沙市往宜昌約一百英里。往漢口約三百英里。去年五月。沙市往漢口陸路。被水衝沒。天旱時方可通行。沿途生意頗盛。沙市有河兩道。不與揚子江合流。其一爲邊河。向北流通至大白湖。有水一支。通至荊州。大白湖有小河一。長約二十英里。直通三湖。其一爲小河。僅容小船來往。此河由張萬歲村起。分數小支。通至三湖。貨船小者。冬令多由南路來。夏令多由北路來。尙有數處支河。亦通舟楫。惟河水甚淺。須待夏天水長。可以暢行。太平河有數處水路。與揚子江洞庭湖相接。太平河角有一支河。最近沙市。沙市通連之水道。由安市鎮起。直至揚子江。距宜昌亦不遠。所經各處。皆貿易繁盛之區。出產煤礦不少。前有法國礦師。用西法開採。未知有成效否。其地多產大木。而出口之木却少。現時沙市

商務不能定日後如何。按稅關所收稅項一千八百九十七年進口貨值銀十三萬五千五百兩。出口貨值銀十八萬一千四百兩。沙市初開商埠已如此暢旺。將來必大有起色也。文匯報西六月二十九號

英外部遣員考察四川商務

有英員前在中國爲領事者。在四川省北方一帶游歷。所游之地。爲前英國派來中國考察之員。所未經親歷者。合二人所報情形觀之。俱稱四川一省。爲商務最盛之區。該員由重慶北上。至保甯府。以至廣元。再由廣元循北京至西藏大路。入西藏界。向西北行。至西藏邊界。該處俱係土番所居。再折而往東。回至近府城之處。西藏西北界內。該處多回回教人。生意以藥材麝香爲大宗。此地商人與西人來往甚洽。極欲知西藏情形。及西國礦務輪船鐵路公司洋貨價目等事。人數雖眾。絕不熟習外情。日爲官員虐使。僅供使役而已。泰晤士報西六月八號

三水商務

三水一埠。與梧州同日開爲通商埠。縣城圓周約三英里。居民約三千人。距省城一百英里。距梧州府城一百二十英里。開埠七個月。共收稅銀三千八百十五兩。進口之貨。以印度棉紗爲大宗。麵粉白糖英國火油次之。進口之貨。爲海參魚乾紙烟葉。

等三水爲往梧州必經之地。進出口貨雖少。然船隻載貨搭客極多。每日過往船約三十隻。搭客約二千人。工藝人多以造船織纜爲業。距三水約三英里。地名新安。居民約四五萬人。最爲繁盛。有縑絲廠及電報局。三水開埠未久。有人欲設法禁止印度棉紗進口。其事未成。其地產芭蕉扇。所出醬油最有名。不特省城銷流甚廣。並運至歐洲。爲製外國食品之用。新安河道多沙灘。每年中僅二三個月有水。僅深二三尺。雖吃水極淺之小輪。尙不能行駛。必至佛山停輪。搭客轉換小船。方能前進。常年水由北江流至西江。如夏令多雨之時。水由西江流至北江。沿江居民多被水害。有以船爲家者。日後三水商務如何進益。此時尙難逆料。有久經閱歷之人。謂三水商務較勝他處。因所運各貨。多由佛山經過。銷路甚廣。惟天氣潮溼有霧。冬令水涸。舟行不便。居民稍覺不宜耳。字林西報西七月十四號

四川教案

四川教堂鬧事後。廣西教堂。又有法國教士被害。中外交誼。時有齟齬。乃各省教堂復疊出教案。真有可爲寒心者矣。去年德國傳教士在山東被害二人。德國索取膠州。並山東一省亦屬與德國交涉之地。倘四川教案。傷損人命產業。各國若援膠州爲例。中國其疲於奔命歟。卽各國之人。擇肥而噬。恐亦從此無甯日矣。各國雖欲助

中國爲自主之國。盡力保護。然中國每因民教不和。以致輻輳。亂民如此其多。中國亦無善法。他國何能盡力保護。英國非不欲力助中國。免因教堂滋事。以致賠款割地。設英國教士在中國受害。英國若置教士於不顧。而惟保護華民。將何以對英國兆民乎。英人之意。謂福建古田教案。未曾向中國索取額外利益。實爲英國失策。四川教堂鬧事時。耶穌天主教士均在其內。英國若不借此要索利益。必爲別國占奪。英國因教堂鬧事。與中國交涉有礙。他國何獨不然。故英國極欲中國全國保護。將中國律例全行改變。如英國之於埃及者然。他國不允。因而開戰。亦所不顧。中國國事紛擾。至於如此。若因商務利權。以致開戰。則不值爲之矣。若中國不能自變。英國但虛與委蛇。助其氣燄。是將英國商務自塞其源。於我國殊無便益。倘北方爲俄德所有。南方爲法國所有。英國商務。或者當勝前十倍。中國如欲英國保護。須將全權付託。凡水師陸軍礦務鐵路。一切改章。妥籌善法。英國若不能有此權力。只可任俄德法三國在中國如何布置。英國僅步厥後塵。總之中國若不大加整頓。卽欲格外保護。英國商務。亦不能得大利益也。

香港報西七月十六號

外國時務

論中俄日三國時局

德國願爲戎首。強佔中國之地。在彼以爲得計。獨佔便宜。不致落他人後。按中英和約第五十四款云。倘若他國今後別有潤及之處。英國無不同獲其美。立約之時。英國議云。他國不得援以爲例。如有不從。亦必阻止。因在東方商務利益甚廣。故有此議。地中海一帶。以至東亞。英國權勢得以管轄。新嘉坡可以遙制東方商務。香港亦可以鈐制舟山。舟山雖不屬英。然可唾手而得。英得威海衛。筦海洋之鎖鑰。日本海軍欲與英國聯合。其議若成。英日兩國可派兵二十萬。直抵亞洲內地。兵勢強盛。他國亦難與之抗衡。其權歸英國主持。聞中國允將威海衛租與英國之時。俄駐京欽使。使用大言恐嚇。總署謂如此辦法。恐啟戰釁。總署堂官答云。俄國若預備開戰。則戰端必開。但俄國此時並未備戰。俄國之意。早已預備占奪中國利益。惟一時尙未齊備。須俟西伯利亞鐵路造成。乃可遂意。計鐵路須三年後告成。三年之內。旅順口防務一切。當已極意經營。日人恐不能如前之易於得手矣。俄人撥三十兆盧布。製造戰艦。三年後次第告成。中國處此。岌乎殆哉。波蘭滅亡之禍。恐復見於此時矣。俄租旅順口。中國租二十五年爲期。俄已暨足。蓋不必及期。而旅順口已爲俄人屬地矣。俄人在滿洲地面。若已爲所固有一切歸其管束。中國官員似已爲俄制服。所有要索。不敢不從。中國食鹽。向不准私販。海參崴所出之鹽。亦允俄運至滿洲銷售。免其

納稅。中國人多好體面。祇因萎靡不振。遂致甘落人後。日本民心。不願滿洲高麗之地。盡爲俄人占奪。二三年後。俄人卽有練成兵五十萬人。在該處地面。日人未嘗不知俄人之意。新製戰船。欲以攻擊日本。然日人亦不欲爲俄所敗。其意欲中國精練兵五十萬。一半在南。一半在北。可以壓服俄人聲勢。無如中國人數雖多。皆以息事甯人爲主。又不重視武員。中國若不急圖整頓。恐有傾覆之虞。曠觀大局情形。中國實難與外國比較。練軍製器。皆不足以資緩急也。

倫敦報四月二十四號

論歐洲各國交涉情形

歐洲各國。共見其聞。覘俄國舉動。卽知其意所在矣。法國聽從俄國主使。盡力襄助。將來俄國有利。則坐享其成。事後揮之使去。並不感其受惠。亦事之所必至。兩國交情一離。恐法將從此解體矣。後來時局。大有變動。亦未可知。西方各國。與俄交誼。不甚聯絡。俄本不嫌於心。法國帑藏。則任俄人揮霍。口岸則任俄船出入自如。盡意結納。兩國之聯絡可知。但恐法國難以持久。日久懈生。德奧義皆與俄國爲鄰。不得不與俄親睦。實欲自占其利益。倘無所獲。將羣起而背之。三國常欲互相聯絡。以期日進強盛。奧德二國極意親俄。亦爲時勢所逼。日後交情瓦解。法必轉而攻俄。俄與法戰。亦未必能大損法國權勢也。奧德俄國交情。與俄法兩國不同。日後將有不利於

俄亦欲得二國而甘心。奧德二國將待俄國兵力既足而後從事歟。抑見俄國有可乘之時而先發制人也。揣度其意二者必居一於此矣。聞土耳其欲助德奧義三國。日後恐致啟戰端。戰事一開。俄國必受虧損。人皆以爲小大相敵。小國必爲大國併吞。而抑知有不然者。小國若有萬國公法保護。亦可轉弱爲強。瑞典比利時荷蘭丹麥國皆蕞爾小邦。特有公法保護。國勢足以自立。俄土二國互立條約。歐洲各國羣相屬目。視其舉動。不僅德奧義三國之睥視其旁。英國亦防與俄日後失和。近見其舉動如此。更知其多行不善矣。俄人之事不能久蔽沙侯之目。沙侯實見當今時勢。不值因此開戰。故此時以息事爲主。倘俄有意外之舉。則英必於一戰而後已。一有戰事。美日必然助英。現在情形各國時局變遷。必不如在東亞時之緩。美國亦當增置武備。美艦之列在太平洋者。俄人斷不料其有若是之精。俄人舉動。事事爭先。似不應如是之速。所慮者日本亦爲俄人仇視。俄德兩國交界。德人精練之兵。可與俄人對敵。俄雖有法相助。在亞細亞洲中。尙可稱雄。倘在歐洲。尙有強大之國相敵。合縱連橫。俄國雖強。亦未必能俯視一切也。

字林西報西
七月廿六號

英國商務會問答節略

英國商務總會董事以商會所議之意。問於外部大臣曰。一爲俄法德三國在中國

如此舉動甚有損於英國商務。二爲請中國不得將揚子江割與外人。英國亦應出爲保護。三爲各國在中國求取鐵路利益。英國亦應向中國求取造鐵路。由英屬緬甸至揚子江之上游。外部大臣沙侯答曰。承問三事。皆已具悉。俄法德三國在中國情形。衆所共知。無庸贅述。三國如此舉動。實有不合理之處。英國不能贊一詞。三國與中國商務交涉。無甚損益。不致占奪英國權利。英國按照天津條約。得利甚優。他國非不欲奪我利權。然日後時局。實難逆料。一時或有變動。亦未可知。至我英國利益。按照天津條約。不致損失。惟釐金一事。於商務最爲妨礙。英國常欲設法盡去其害。特其中多有窒礙難行。英駐京使臣。已設法將中國釐金。交與稅關辦理矣。中國鐵路。前下議院會議時。業經理論。此事須下議院參酌妥當。方可施行。人謂他國在中國皆有鐵路利權。英國亦應向中國求取。他國既可求取。英國奚獨不能。惟造鐵路之款。須預先籌備。攜帶股本。親至中國求取。方可有成。萬一求而不得。英國亦無不盡力保護。然他國向中國求取利益。英國亦不能從中阻止。由緬甸至揚子江上游。鐵路經工程師勘驗。謂有多少爲難之處。所過河道。諸多不便。山路亦崎嶇難行。現計造路經費甚鉅。且多危險。恐其無利可圖。凡人作事。必須通盤計算。如見爲無利可獲。則不願費此鉅款。必將改而他圖。惟中國可造鐵路之地。所費少而獲利多。

者。英國之富商。想必已經籌及。中國與外國交涉辦事。時形遲緩。無論事之有益與否。每每如此。近來各國皆有責言。故辦事較速。然辦事能速。英國固有利賴。若英國向中國求取利益。恐他國不能代爲迫使。使其速成也。中國鐵路。斷不能由中國自行築造。必歸外國人辦理。鐵路不日可以四處通行。若歸國家自造。恐成功無日矣。英國倘能借與中國鉅款。中國鐵路。自可從速告成。但告成之後。情形如何。余亦不欲費詞耳。至於我國商民。欲國家相助。向中國求取利益。我國家如有此力。定必援手。惟須各商民自行謀幹。可期利益日增。他國在中國商務。人皆謂日漸加增。英國商務日漸減少。余竊不以爲然。英人新製器物。考究精良。皆可奪他人之利。卽無國家保護。尙可操券而獲。況國家保護。惟恐不周。其獲利豈待問乎。泰晤士報西六月十五號

論香港九龍推廣租界

英國欲在香港對面九龍地方開拓租界。業經英駐京使臣向總署理論。日久未成。刻聞中國已允所請。劃定由東至南界址。由波斯灣至深水灣。南頭海島。亦在其內。從一千八百九十八年七月一號起。作爲英國租界。以九十九年爲期。查九龍一地。暨南頭島。英國初向中國索取時。中國卽已允許。遷延日久。皆因洋面界限之事。今中國既已應允。英國若有戰事。戰船卽可入內停泊。其地共計有一百方英里。除九

龍城不在內。其在租界內居民均照英國律例管束。英國得有此地。極有益於商務。水陸軍事。蓋香港商務逐年加增。一千八百九十七年。香港進出商船共載重十六兆五十萬噸。則推廣租界亦事之不容緩者。鯉魚門爲由外洋入香港必經之路。雖不過半英里之遙。宜派兵駐守以扼其衝。南頭島在香港之西。爲船隻進出口必經之所。兩路鈴束。敵船斷難飛越。英國之租此地。非欲有利中國之土地也。亦欲護香港之商務耳。按照南京條約。香港屬英。已閱五十六年之久。近今羣雄環伺。大有先發制人之勢。英國不得不向中國求取此地。保護香港。亦時勢所使然。中國亦知我國辦事公平。是以允爲從速商辦。英國已得九龍租界。若仍未能布置盡善。則誠自取之咎耳。前五十年。英國初得香港時。管庫西人。卽云租對面九龍之地。不宜再緩。緣香港係一海島。安設礮臺。形勢不便。雖屬商務繁盛之區。爲英國第二著名商埠。若得九龍一地以資控制。商務必將日見增盛也。

泰晤士報西
六月十號

俄人經營旅順口

俄國延美國機器廠頭目。商議布置海參崴旅順口船塢製造局等事。該處船塢地位不寬。修理大號船隻。尙不敷用。俄國海軍之在東亞者頗多。且多頭等鐵艦。故擬將海大兩處船塢。或改大基址。或重新建造。以免回國修理。輾轉費時。現聞定議籌

款十兆羅卜。爲開擴海參崴船塢之用。海參崴天寒冰凍。諸多不便。未必費如許鉅款於無用之地。窺俄國之意。殆專意於旅順口船塢。旅順口爲遼東口岸。將來如何布置。俄國已早有定衡。其地不僅作爲屯駐海軍之所。且將作爲造極大戰艦。並製造局之用。將用全權管轄。他人不得預聞。況現有西伯利亞鐵路。可直通至本國。轉運材料軍火。無不便利。以故在旅順口立意經營。已籌備二十五兆羅卜。爲擴充船塢之用。機器材料。皆向美國採購。故延美國製造廠頭目。與之熟商。西伯利亞有河。通至太平洋。俄人在河口布置一切。以便來往船隻行駛無礙。倫敦報西六月十七號

俄人興辦屯墾

西伯利亞鐵路總辦云。一千九百零四年。西伯利亞鐵路造成時。可於三十日內環遊地球一周。現在造一鐵路過日里斯河。不日運載俄人二十萬。並其家屬移至西伯利亞。各給以地段。俾其開墾種植。此路既成。出產穀麥。運載益形便捷。運費定價從廉。現在尙未通行。每日僅運穀麥五十車。近日已有西伯利亞所產穀麥。運至德奧等國銷售。自美日開戰事後。益較前暢銷矣。倫敦報西六月二十四號

日本近年貨價長落表

日本近年貨價長落。以十年前較之年多一年。惟本年則逐月增長。均就百元計

一千八百八十七年長至一百零三元

一千八百八十八年長至一百零七元

一千八百八十九年長至一百十二元

一千八百九十年長至一百十七元

一千八百九十一年落至一百零九元

一千八百九十二年落至一百十五元

一千八百九十三年長至一百十九元

一千八百九十四年長至一百二十六元

一千八百九十五年長至一百三十六元

一千八百九十六年長至一百四十五元

一千八百九十七年長至一百六十一元

一千八百九十八年正月長至一百七十元

二月長至一百七十三元

三月長至七十六元

四月長至一百七十九元

五月落至一百七十七元

日本報西六月二號

美日戰電彙誌

聞德提督問英提督契斯達謂如美人攻轟馬尼訥而德人干預不許英提督當如何舉動英提督答云此事惟美提督與伊自己知之文匯報西七月十七號日斯巴尼亞

通國政府俱已暫停辦公此舉乃講和先聲 三地阿哥現已投降美人令鎮守

該處之日兵排隊出城待以降軍優禮將軍械聚置一處俟運往日國時再行給還

以上路透電西七月十八號

德巡船科木蘭今日抵港報稱小呂宋依舊安靜美兵及島兵

並無舉動聞島兵首領阿桂拿爾度已與小呂宋巡撫會晤一次所議如何不得詳

悉美國水師各艦現均停泊在喀維疊德人舉動甚為乖張美人銜之次骨是以美提督涂威將港口嚴加防堵香港所來郵信一律退回不收美提督涂威告德人云汝等舉動深違吾意現在耐無可耐以後切宜留心又據美兵船屋靈批愛之武弁云一俟美國兵到即須合攻小呂宋城惟恐小呂宋不待攻擊即行投降香港電西七月十八號

美德兩國交涉日為棘手有德礮船伊獵尼經過馬立費爾士美提督涂威遣文書船馬克勞克前往阻止詢問來意德副提督地德立喜斯不服聲明德兵艦有自由入澳之權無須搜檢美提督覆謂德國實無此項權利香港電西七月十九號美

國兵艦多半駐泊廣達拿麻有數艘預備往攻波多立哥泰晤士報云美國收取飛立賓羣島英國毫無嫉忌之心路透電西七月十九號美日兩國議和之事日京馬

得立德及美京華盛頓均不承認美水師協鎮華森率領艦隊定於此禮拜杪開行前往日斯巴尼亞以上路透電西七月二十號美人現與古巴土匪漸不相能因島匪

深恨美人不將三地阿哥交付與彼管理而美國將官及兵士藐視古巴士人之心未能斂抑恐不久土人與美人有爭鬪之事路透電西七月二十一號美兵又將相近臘特

龍斯之禮拜島或名瑪斯島佔踞香港電西七月二十一號飛立賓羣島政府各職守已由阿桂拿爾度派定阿桂拿爾度為總統鮑爾疊米羅為兵部大臣衣巴拉為內務大臣脫

拉阿斯為大學士。本月十七號。美將安得生。將舊金山營之兵士。派至巴臘納

克島駐守。島匪在相近麥賈特之處。打一敗仗。以上香港電西七月二十二號日國政府

不認飭令三地阿哥投降之事。現須傳駐守該處之日將多臘爾至案。開堂鞠問。訊

其何故投降。英報接日都馬得立德訪事信云。該國各大臣齊心集議。咸以議

和為是。路透電西七月二十二號美國第二次派至小呂宋之兵士。由提督噶靈督帶。已於

本月十六號。行抵喀維疊。日人在小呂宋城。現有兵士四千。尚可禦敵。餘四千

人。俱患疾病。另有受傷兵士六百。恐日人不能久守也。以上小呂宋電西七月二十二號美

京華盛頓確實消息云。日國如議和。美國應將波多立哥收管一節。甚為緊要。並須

將臘特龍尼。相近飛立賓羣島收管。作為屯煤之所。至飛立賓羣島。應留與否。尚未定議。

本月十八號。美日兩國水師。在滿薩尼羅海面交戰。日國商船三艘。礮船五艘。盡

被美船擊燬。聞是役日兵死者百人。美兵則一無傷損。以上路透電西七月二十三號英國日

報。接德京栢靈訪事人來信云。除英國之外。其餘各國。現俱議定。不准美國將飛立

賓羣島。收入版圖。華盛頓確實信息云。美總統之意。不欲允准攻擊日斯巴尼

亞口岸。若欲速了戰事。則勢不能免。以上路透電西七月二十五號美國陸軍總提督賣兒斯

率領兵士四千人。礮隊五營。每營有礮六尊業已啟程前往。攻擊波多立哥。所有美國第一

隊全營兵士定於下禮拜啟程前往日入預備竭力抵禦現防堵甚嚴以上路透電西七月二十

號六

中外電音

挨爾蘭國自治之例現經英國下議院議准路透電西七月十八號 俄京聖彼得堡來信

云倭近俄界之中國甘肅省內現有叛亂之事路透電西七月十九號 中國廣西官兵現

已將北流縣城克復土匪遂棄陸川容縣而遁香港電西七月二十號 前有意人名色罷

體與科郎比亞合衆國在南亞美利加洲 銀錢交涉齟齬一案經前任美總統克利蘭公斷

科國還銀了案迄今仍未照辦現已由意國調派水師兵艦一隊馳往該國之喀達

旗拿海埠逼令速了此案路透電西七月二十一號 英理藩院侍郎已允滙豐麥加利二銀

行添發鈔票之請香港電西七月二十一號 英國政府議定添設外部侍郎一員專理與阿

非利加洲交涉各事宜路透電西七月二十二號 廣西亂事仍未平靖粵督仍陸續調兵前

往並招募護勇五百人以衛廣東粵省水師提督現預備調派水師兵艦前往廣西

雷船十二艘需費英金八兆磅因俄國新增各兵艦故英海軍亦務必加增必使與

他兩國水師合併相埒路透電西七月二十五號

西伯利亞鐵路

前期敝報刊有論說。步法國商務議廳後塵。奉勸我法工師。與商賈等。分外加意擴充我法與俄國交好之誼。論說上嘗以鐵路一事。畧提一二語。常謂西伯利亞鐵路。現在照常築造未久。鐵路已竣之處。以前無從深入者。皆可一律任人來往。暢興商務。本館因此按地圖公司。與別項公司。接到之鐵路新聞節錄數事。以補前次之不足。想亦閱報人所喜聽者也。人皆知由聖彼得堡至拖木士克城之鐵路。已在四月一號竣工。開行。該二城中間所有路途。約有五千四百啟羅邁當。拖木士克原係商務薈萃之區。礦苗富足。赤金白金銅礦等。出產皆極旺。惟俱在阿爾泰山之對面。此處製造亦極精良。所有牛皮貨物。天下聞名者。亦出在此處。夫拖木士克原非西伯利亞之首城。俄木士克現在之首城也。托博耳士克以前之首城也。然兩城俱因地勢之不佳。商利不興。遂使拖木士克勝彼多多。西伯利亞首段鐵路。卽以拖木士克城爲界址。首段鐵路里數。早已計定。惟不知其底細。火車業已開行。有六晝夜之久。常行不息。人見之者。無不稱奇道異。蓋其處火車每截皆仿新式製造。以致開行時殊平穩。坐車者不覺戰慄。擊動之聲。鐵路旁復設小路。以便散步。火車停止處。設有

食店一客棧數處更有書房一廳事一內有洋琴等玩賞之具諸事佈置秩然夜間燃以電燈廳中設烘火爐一以備冬寒之用換氣生風機器一皆設造精巧凡俄國巨腹賈俱能深入西伯利亞內地行其商務現在又有人遞來函件據云鐵路中段工程直達拜喀爾湖此時亦已興工開築俄工部尙書王爵啓兒可夫在外洋定購輪車上所有各種雜件以備鐵路中段之用此項定造貨內有上等最捷機器拖貨車共二百乘各等新式新法載客車不下千餘乘該段鐵路自拖木士克起始經行一千八百啟羅邁當經過額爾庫特士克城至漁夫所居小邨名利子米尼諾者爲止而拜喀爾湖即在其旁火車至此後即轉裝於極大之火輪渡船即將火車與搭客自西岸載至東岸登岸後又由陸路開行該處名米少伐亞即西伯利亞鐵路末段之首至末段鐵路之結尾即海參崴他人亦已知之矣火輪渡船上亦設有鐵軌長有二百邁當重有八百噸四週圍以鐵甲船首設有鐵齒輪殊鋒利以便碎冰開駛務使在寒冬堅冰之中亦能來往無阻凡人皆知西伯利亞鐵路全路竣工後共長七千五百四十三啟羅邁當經過東西兩西伯利亞渡過拜喀爾湖轉過阿橫爾江沿岸諸地則所經之地固不少矣再又西接俄國向者已有之鐵路則自聖彼得堡至海參崴之一帶鐵路共長有一萬餘啟羅邁當較之亞美利加紐約至三佛耶

西斯谷之鐵路環繞太平洋者尙長其一半。至西伯利亞鐵路原非爲自歐至亞。自亞至歐。載運重貨而設。惟專爲歐西行旅之人。使得一更短更便之路。由歐至日本。免得長征跋涉。更爲出運珍貴之貨。如茶葉皮貨絲綢等。至論稍近之處。則有此鐵路後得利之貿易。俱可在鐵路鄰近各處。與銷場興旺之處。時刻往來交易。有如俄比與烟尼塞兩江沿江各地方。地土豐腴。盛產五穀食物。如大小麥等。供給民食之外。尙有餘多。頗可以其美餘出運。過拜喀爾湖。與黑龍江省兩處。此處天氣嚴寒。能種出熟者。惟有蕎麥而已。此處荒漠居多。一望無垠。最宜放牧。於是以該處富有之物。如食肉牛羊馬匹等。轉運至俄煙兩江鄰近之處。則以有易無。獲利兩便矣。且此西伯利亞鐵路。雖全工未經告成。亦將在極東海參崴沿黑龍江一帶。先爲開行。將來凡東方所有之物產。在海參崴起裝火車。載至加罷羅斯克。由是換裝輪船。入阿模爾江。至西伯利亞內地。此固商務之一大轉環也。於是人皆謂西伯利亞地方。邇來任一極大之職事。而使環球之商務政事。皆極有關繫。此言良不誣矣。然西伯利亞一地。不獨專恃鐵路。得以轉輸其土產。然更由該處河道流通。得以暢銷其貨物也。以論該處河道。則港汊紛出。大而且闊。皆可爲河運之路。每年各國之到該處貿易者。日漸加多。前章所言之俄比河。乃一大江。發源于拖木士克。穿過托博耳土克。

直注於北方海灣。其長足有三千二百餘羅邁當。其外支流甚多。其間數河如依爾底等。其大小與俄比大江不相上下。依爾底河經俄羅斯南地。至蒙古界而止。該數大河所過之處。地方皆甚富饒。各物俱有。以故用水運一法。運出之貨物。已覺爲數不資。但在俄比江內。因有數處。江流湍急。波浪甚大。行船不便。久已聞名。然自俄比灣至江出口處。行船並不甚妥。但至今日。人皆知俄比江內。無不可行船之處矣。沿江而上。直至依爾底。西伯利亞之大小麥與礦產等。皆由此出口云。

中法新彙報西七月二十五號

英人熟籌在中國之商務

西六月十四號。沙侯在外部署內。接到商務會托辦事件之公文。該會由會首斯打福諾楮閣脫君所管領。咨文上應有該會抄示首相之日諭。該日諭總駭該商會在末次每年大會內所議各端。其目如下。一該商會見俄法德三國侵吞中國土地。以爲該三國倘取用禁止他人入其屬地之權。則與英國商務有礙。二該商會聞中國不准將長江一帶地附屬他國。殊覺稱快。並深望英國政府夾輔中國。保守此志。三該商會因以上所列各國。得中國允准於中國內地興築鐵路之故。遂謂倘中國皇上果能索請某租界。准英國在此造一鐵路。直達緬甸。使長江一帶與緬甸相與連接。則是中國皇上權力所至。而可大張中國聲勢者也。此固與亞爾希罷耳高

拱之意相若。亞君於東方時局，別有見地。曾勑一東印度商務公司，監以雷儀君，擴充英國與中國之商務。渠意以爲擴充此項商務，共有二法。或由水道轉運各貨，卽由各大江河運入中國內地，如由長江或由西江，經由南面各省。此其一法也。其二則由陸路，卽以英國爲根基，自英國起程，而至緬甸，直至雲南，倘首列之水路可能暢行無阻，則此路旣爲緊要大端，餘外陸路，惟總其成而已。今日者中國閉關自守之習業，已萬不能行，則英人如欲保全其國權，與商權，或開拓其國權與商權，此種開拓商務之法，已是萬不可少者矣。按行此議，則緬甸一地，必須與中國西南相與聯絡，卽築一鐵路，使開雲南之門，而濟長江之流。然後英國或自緬甸，或自上海，或自香港，假水道與汽力，將在中國所有商務蒼萃之區，及商務之關鍵，堅持不釋。今者俄法兩國，貪欲旣如是其大，所求者旣如是其多，則欲中國另准我英開闢租界，自必不能。我英亦不必妄想矣。亞君又謂，倘我英欲在中國中央，保守我英局勢，又欲在印度竭力保護，不使印度後路之門戶，一旦至敵人之手，則無論事勢如何，必須我英出力把持緬甸、香港與長江上游之進路，務使此項進路常開通而不抑塞，然後可耳。

中法新報西
七月十八號

論英法水師之優劣

自英伯爵張伯倫在盤爾明哈地方倡議後。自英報刊佈英國設計詆毀我法後。自英國某尙書攻訐俄國後。又自英商羣起忿怒各國後。人皆留意於英法兩國之兵力矣。究竟法國水師業已整備。欲與英國一戰。以決雌雄否。此問既設之後。東京回聲報曰。此事所關非淺。本館擬畧爲答覆。茲試以浮於水面之船具等。先爲比擬。夫以英國有用戰船之數。並水師集聚一處之難易。並審擇倚伏之處。並審擇後善備一切。爲水師所不可少者等。數事參觀之。則我國不如英國。婦孺皆知。無庸掩塞。蓋自頒發保護水師之律以後。英國於水師屬地二事。早已首屈一指。其時猶以戰船無多。又復趕緊催造。倍增其數。以致在一年內。已經竣工下水之船艦。鐵甲共有五艘。皆有一萬二千至一萬五千噸之容積。大巡船共八艘。小巡船共二十二艘。以致兩國戰船之數。其時已經大不敵者。至是更添一大數矣。至今日英國可排列成陣者。鐵甲共有三十四艘。載重皆在九千與一萬五千噸之間。其中復有抵制魚雷船之戰艦。最捷最精者。爲數亦甚夥。復有鐵甲二十艘。惟稍舊。然大半已修治。煥飾一新。加於前數戰艦上。猶如彪壯之備兵。加於整數兵隊於已足已壯已有餘之後也。其軍容之盛。可勝道哉。至我國所能以之對壘相形者。鐵甲新艦十六艘。守邊精艦八艘。中等價值鐵甲舊艦十艘。新式巡艦二十二艘。照兩國各有之情形。相提並論。將

不可收拾之破艦與失事壞溺訛誤虛糜等項一切並計在內後即可以見我國水師船械較之英國水師船械乃在三分之一與一半之數之間今姑將兩國戰艦之大小堅敝置之不論英國戰艦大抵外觀雄壯船身廓大佔水亦較闊因此船上布置雜物更形方便更能精良英國槍礮技藝亦甚精熟惟其器械雖與吾國同此程式而得力處較吾國稍次速率亦屢亞於我并難劃一準的並不論英法兩國所刊速率數目表有何記數而虛冒終不能蔽於實際也兩國軍弁亦皆精壯凡官弁之訓練礮手之勤慎皆無所指摘并盡數十載之久恆心歷練爲此余等徑可聲言曰我法各戰艦皆可與英戰艦並駕齊驅而不覺其餒弱此固確實之語而非虛誇之詞也倘以調動之靈便言之即自此處撥調他處而論其轉折之靈動則余等挺然直認曰因英人濱海居多抽其精壯練成隊伍每年乘坐泊近商埠之本國兵輪習練數四是水性既習慣操演亦純熟則其轉旋自不得不分外靈動也我法水師則不然凡招募必能滿額惟其出身稍次於英兵以是我國新兵常退居其後終則調集兵士會聚一處轉運糧精以餉兵士在英亦尙爲靈便在法則兩面跨海中隔以西班牙之地是因地勢之故轉輸間隔而遲緩且難能妥協如願也並亦爲此故法在歐洲外所有屯紮倚伏之處難能整頓完善於是我軍不及英軍之處更覺倍於

從前矣。英則反是。凡在各海道出口之所。無論船往何處。出入俱能循順。我則因欲離避之故。必須舍循順之海道。而取紆折之海道。則我軍之遜於英軍。亦勢所必然也。由以上所言各節推之。則我將畏英之強。而服其挾制矣乎。英人固恨我莫深也。其恨我之心。由外貌視之。消釋已將一世。我將畏其數十年蘊蓄在內者。一旦潰散於外矣乎。曰否否。我終不將攻我之機。假於海軍之力。倍我者。我惟出之於忍。以待其時之至。而其時必將至也。其間我可修艦厲兵。以備抵死撲擊。攻我敵人之商務也。現在辦理交涉者。於一千八百五十六年之約。關涉此種爭戰者。我不知其意何若。以論我等爲水師者。適以此約爲緊要。而謂幸我兩國素來和好。而使我同盟之兩國。頃者雖有睚眦小怨。然仍能和好如初。更能結密也。倘英人以爲我法。現在備兵欲攻擊英人。則是大反從前一千八百五十六年之約。且明知此事大敗其沿海商務。而故欲挑戰。以自招其禍也。英人深知我國。並不自欲啟衅。侵犯英國。且倘英人或有如此行爲。致攻於我。則我必竭力退讓。而使其悔禍知非也。英人於海戰一事。常以我法起亂。改民主。與撥亂復帝國二戰。記憶在心。蓋誤矣。英人未將所以戰事得手之故。反復審度。彼勝也。由我水師散漫無序。無兵官。無水手。非由彼力也。而彼則倨傲自居。自謂水師精良。勝人一籌。英人其能自欺以欺人乎。

斯時女主握余手命眾隨之而行。

第二十五章

余聞言即命眾握手隨行。中心惴惴。時虞失足。所履之地。若空無所有者。女主曰。隨我前行。萬無一失。余雖戰戰然。以半途難於輒止。無奈從行。女主放手命行。忽焉足底一滑。墜於潭下。驚魂甫定。始覺潭下滿鋪石板。幸無傷損。少時立我及僕人陸續墜下。覆壓在余身上。瞥見女主已在地下立定。余即燃燈取火。始見石板方廣約十尺。如地洞然。有天然生就者。亦有用人工鑿成者。怪石巉巖。莫可名狀。地氣溫暖。如初春然。女主曰。余等平安到此。可無意外之虞矣。余正慮歸途如何。過此深潭。亦應早爲設法。正躊躇間。女主令眾人憩息。賞玩風景。再作計較。顧余問曰。汝知此地是何等世界。余曰。不知也。女主曰。試爲汝言之。若有人居此地方。世間一切應用之物。無不備具。誠樂土也。余詫爲莫須有之事。女主曰。此地前有人名福祿者。當科爾立國時。爲人所尊敬。其人最好考究地洞內天生之物。卽如火中沐浴一事。亦經其考察得之。沐浴後卽能長生不老。至其何時到此地方。何時尋出異境。渠亦未向人言及。朕初到此地。亦驚其異。聞福祿有此異能。願從之學習。福祿見余美貌。且善於語言。因携余入地洞。觀火中沐浴。並將沐浴之事。詳細告知。初亦防其害朕性命。因見

其年紀老耄。不久於世。遂堅心欲學其術。學成而返。今爲汝等畧述其由。汝等觀此異境。亦足信以爲真。而非幻術可比也。因謂立我曰。朕初見汝時。汝與烏絲塔妮情好甚篤。今見此奇異。定可回心轉意。與朕配爲夫婦。百年偕老。豈不樂哉。時衆與僕人隨處遊觀。但見福祿之尸。仍臥地下。面色如生。鬚白如銀。其長過腹。試以手撫之。盡成灰燼。似已死數百年者。拾得一物。質堅而色黃。非骨非角。持問女主。女主曰。此卽福祿所遺之牙也。其人生前威福甚擅。世人之性命。皆握其掌中。世間如此之人。不易得也。言已。命立我隨行入火中。立我雖驚惶。然心羨長生之術。亦卽隨下。立我放膽行入火中沐浴。浴畢而出。無毫髮損傷。女主伸手將立我。俛抱謂我二人自此成爲夫婦。地久天長。朕前將烏絲塔妮致死。汝心中懷恨與否。宜以實告朕。今日可將真情盡吐否。朕以義重情長。不覺下此毒手。朕亦頗深悔之。汝勿以朕爲異類之人。當以人間幼女相待。方見親愛。言已。卽握立我之手。令將蒙面之紗除去。立我唯唯曰。亥雅。余與汝恩愛。實無異心。至於致死烏絲塔妮。余不復咎往事。此間情狀。余亦未悉。任汝如何布置可也。謂余不信。有如曠日。余見女主含涕而道。與立我誓爲夫婦。恩愛甚篤。悲喜交集。不覺頓生愛慕之心。女主見立我露出真情。滿懷歡喜。乃握立我之手。置於頭上。屈膝跪地曰。朕候至二千年。始得相遇。今旣得諧重爲夫婦。

朕心已足。別無他求。卽當眾發誓曰。自今以後。勉爲善事。諸惡勿作。同心共命。以圖永久。言畢。卽以余爲證人。與立我成婚禮。自摘頭上所戴冕冠。贈與立我曰。以此爲贈。汝戴此冕。可以長生不老。富莫與京。世間凡主不能易也。凡世間所有之事。意之所向。惟所欲爲。無不如意。世人心。皆能洞見。如明鏡然。上至九天。下至九泉。一切生靈。悉歸汝管轄。世間疾疫死亡。貧賤病苦。皆不爲患。尊如上帝。雖朕亦歸汝掌握中矣。祇以情分所在。無以爲報。故將大權歸之於汝。作爲酬贈。雖疾風雷雨。日月晦明。人世生死。不致或有更變。朕今盡情傾吐。汝其識之。言畢。一手持燈。深入地洞而去。余等亟從之行。洞內有石梯一具。眾隨女主拾級而下。約十五六步。忽見一山。山路紆曲。溪深而黑。似不通人跡者。雖有燈火照路。仍苦難辨。如入火山中。情景循山徑行。約半點鐘久。徑忽窄而低。俯首而過。長約五十碼之遙。竄畢。又至一地洞。其大無垠。旋又過一徑。至第二地洞。較前稍小。又至一徑。畧露天光。女主曰。此地洞人死後變爲禽獸。化生卵生。皆由此地發放。向前行。見有光一綫。發現如日光然。少頃至第三地洞。長約五十尺。白沙鋪地。細軟如茵。牆壁滑澤異常。洞中並不窈黑。透紅色光。令人生愛。忽聞有聲。迅發如雷。卽見光氣如虹。斜掛半天。少時俱滅。而洞中之光依然。雷震時。女主令眾近前曰。世上萬物發生。惟雷之力。若無雷電。則萬物生機。

息矣。旋領眾四處遊觀。行近光處。衆人覺心開意朗。旋見雲氣舒卷。風吹若絮。女主放出擎雲手段。舉手向上。雲氣即散。謂立我曰。朕權在手上。雲氣若近身前。即可以手禦之。惟先將衣脫卸。恐被火焰所焚。日光則以口吸之。立我曰。余雖非畏死之人。然吞火恐有傷身體。若有損傷。豈非自尋煩惱。女主凝想片時曰。汝見朕在火光中無恙否。汝若行之。亦必無恙。立我曰。如汝言。情願冒險而入。余聞此異。亦願從之。女主曰。汝功候未到。無能爲役也。朕之吞火。如在火中沐浴。若多沐浴一次。則容貌更美。年壽更長。斷不有損於朕。人若吞火之時。將胸中一切惡念。滌洗與朕無異。汝等可預備一切。不久即當起行。所經過之地洞。又一境界。不能如此時之佳美矣。余等見各奇異。無不駭然。莫知究竟。

第二十六章

余等聞言少息。漸聞有聲自遠而至。且行且近。女主聞聲。即將所衣斗篷卸下。散解其髮。如初闢乾坤時神人之狀。衆皆却立。見有火光飛過。風行雷掣。瞬息卽至。女主以手執之。火氣稍卻。圍繞女主之身。女主口吸之。火光中望見其貌。美麗爲世間罕有。少時顏色陡變。非復如前。形容枯槁。面目黧黑。余疑爲目眩。定眼看時。見女主移步近前。一手撫立我之肩。其臂似瘦損於平時。面貌漸變老態。立我一見。似覺驚異。

女主曰。情人何驚惶如此。莫非火中有異乎。言已。似自覺其老者。以手自摸其頭雲鬢。盡委於地。身材亦縮小如猴形。芙蓉之面。皺如雞皮。麻姑之爪。狀如鳥喙。旋見其身體發顫。倏倒於地。維時身體愈縮愈小。細觀面貌。雖與女主無異。宛如將死時之狀。但聞女主低喚立我曰。情人勿恐。朕貌雖變。瞬息卽復美觀。勿以爲訝也。朕所履之地。二千年前。汝之祖被朕殺死。今朕亦卽死於是處。余二人見此情形。驚倒於地。約數分鐘始甦。張目四看。見立我與僕人依然倒臥。女主亦倒斃在地洞中。玫瑰色光稍暗。余自揣火光中。豈別有一世界。女主既有此權勢。何至變此形狀。女主居此二千餘年。何等勢力。何以忽焉變爲無用。殊難索解。余起立。欲將臥地諸人掖起。又欲往掖女主。惟恐爲立我所見。心中不悅。其時僕人已受驚斃。因其平日膽小所致。久之立我亦甦。余告以僕人已死。立我曰。余僕人初入地洞時。頭髮作金色。今變作白色。已如六十年之老人矣。余問立我曰。今將若何。立我曰。無已。惟自尋出路耳。余曰。前路已絕。將向火光中逃奔乎。立我曰。余願葬身火窟中。但恐求死不得。余曰。我等絕處逢生。亦未可定。立我曰。余得死所。亦願從之。免等候二千餘年之久。多一番歷劫耳。卽取火燃燈。欲行。忽見火光陡近。旋轉如輪。其行甚速。立我與余齊立。欲觀其究竟。少頃火光已過。遂立意起行。行過僕人尸骸前。握其手與之別。立我在地。拾

取女主所遺之髮。嗅其香氣。留爲遺念。因憶女主生時恩義。將來當有會面之時。乃跪女主尸前而誓曰。倘余幸獲生還。誓不再娶他婦。女主候余至二千餘年。余亦斷不相負。生生世世。無渝此盟。言畢起程。斯時女主與僕尸骸。仍倒臥在地下。念其平日情義。爲之傷感。然無法可救。不得不行。乃偕立我覓路而出。

第二十七章

行入地洞之下。若不識路徑。幸余來時約畧記憶。否則茫無定向。不免埋沒於此地矣。洞內昏黑。不過藉燈光所照。蹣跚而前。幾乎墜入深淵之下。心驚膽戰。有時碎石傷足。亦不能顧。一路惟默默無言。但求苟存性命。行約數點鐘之久。不知行至何處。幸路旁有一火山。記是來時曾經過者。久之又經過福祿所葬之塚。忽憶僕人所携之板。已經折斷。少頃行至深潭。只有二法。一則一躍而過。或可幸免。一則餓死於此而已。轉念潭寬雖僅十餘尺。余二人饑餓交迫。足力有限。潭深無底。時又昏黑。何能躍過。惟有候光氣透露時。再作計較。至光氣何時發見。並無定時。照來時計之。約二分鐘久。光氣卽便過盡。惟有席地而坐。俟光氣見時。再行躍過。坐頃。燈油亦盡。火卽息滅。但聞洞內陰風颯然。如有千軍萬馬之聲。幸風雖大而緩。不致寒氣中人。忽見一物飛來。將立我連頭並足。渾身蓋住。余大驚。不知爲何物。以手摸之。乃知爲女主

具 獸醫器具與方法。耕田器具與工程。如治水乾田。掘溝置管通水。厚水澆灌。

犁田耕地。播種培植。芟艸收穫。預備與收藏田地中所有之出產。或牲畜所有之。

蕃滋。以上需用之木具。鐵具。機器等。耕田機車。或用牛馬。或用風力。水力。汽力。電

力推引者。耕田自行機器。與牲口拖引車具。風磨。灌水機。秤錘。鄉間農車。與轉運

之器製。倉困地窟。與治麻之場。整備牲畜食糧之具。備儲肥料。與糞壅田地。

肥料之種目。外方購來之肥料。開用池水之法律與章程。

第三十六種種葡萄之法與器具

種植葡萄所需房舍之種類。種植葡萄之器具。如掘地具。雜用車。耙泥鋤。與截枝

扞種採摘等雜具。收集摘下之枝。收穫具。地坑。酒坑。內應有之器。載葡萄車。選

葡萄具。壓葡萄具等。葡萄釀酒法。藏酒法。藏酒具。與加於酒內使不壞之藥物。酒

膠。酒病與驅病之方。

第三十七種農務器具與法

凡與農務有關涉之作廠。可增於種田類者。如奶廠。奶油廠。奶餅廠。煮溼酒漿廠。磨

粉廠等。醇油廠。光滑油廠。預備紡織質料廠。飼養鷄鴨鳥羽之屬之地方。哺

育雛鳥之法。與器具。肥養飛禽之法。與器具。

第三十八種種植田地之各法各處地土之種類與出產多寡之總數

攷管地土之性質與水道之流通便於畊種與否講論地性之圖講論種法之圖各處地勢之圖各處種田之圖田產仿單總簿各方業農之數區分熟田出產總數租牧牲畜之成數農務實在之進境特從一千八百八十九年爲始所有實在之精進講述農事之史乘向來所有除舊翻新之變法各種田地租種人工牲畜地面與牲畜滋生之大種等所有價值不同之記筆各種農學會專司擴充農務及成全農務者攷察地性館農務工人局局內所有圖樣措置人員器用費用與工程等皆在內各種零立之農學會務農會合夥種田會租種田畝招工承僱施濟農人會農務保險有涉農務之律例管理農務之官員各種農務書籍記錄度支經劃界址之樣本以及按期出發之書報

第三十九種田地所產可食之艸糧

五穀類如小麥元麥大麥稻菽黍稷以及別種秬粱等類或帶穗者或採粒者 荳屬如蠶荳毛荳豌豆豇荳扁荳等 根株如番芋落蓬蘿蔔蔓菁馬藻等 造糖之艸如胡蘿蔔甘蔗甜高粱等 別項艸種如茄灰蒿菓等 打油之苗無論或在莖或在子如阿利伐及各種食油 收藏或窟藏之乾艸與食畜之穀食

第四十種牲畜所生可食之血肉

牲畜肥油。鮮奶與陳奶。鮮奶油。鹽奶油。或新鹽奶油。和奶餅食。各種蛋卵。

第四十一種可用之田產

用為紡織之草木。如木棉。大小麻皮。苧麻。苧麻之莖。苧麻之子。苧麻之紗。拉米樹葉。美洲經用之麻。各種樹木之鬚。各種出油之樹木。無論其莖出油。或其子出油。俱在此例。樹木所出不可食之肥油。硝洗皮貨之樹。如榆皮。研粉。即可硝皮。絢染顏料。藥料。合藥之本草。烟菸。或以莖或以葉或以子作煙備用。作皮酒草。分羊毛草等。自出之青草場。與種出之青草場。所出有用之草與子。未經理清之羊毛。或已洗者或未洗者。獸畜身上之鬃毛與蠶絲。烏羽。柔毛。毫毛等。

第四十二種有用之豕與所有之出產害人之虫。豕與坩生之草木

照格物學士之說。所集各種有用與害人之虫。豕。蜜蜂。繭蠶。出顏料之虫。出墨西哥。培養與保護蜂蠶之法與器具。蜂蠶所有之出產。如蠟。蜜。絲。繭。消除毒草與害人虫豕之法與器物。

第八類種植園地與種樹凡六種

第四十三種種植園地與種樹之法與器具

園丁種園或種樹秧所用之器具。如鐵鈔、鋤耙、刈草具、轆草軸、削樹拴樹摘樹裝包與載運之法。小鋸、小梯等撐樹之條、澆灌之具。擺飾花園之器具與物件。如磁器、泥器、椅檯、飛泉、招貼等。一切園囿中習用之器物。花房與花房中動用之物。烘花、火爐、草薦等。房屋中貼造之玻璃花房。栽種水草之水櫃。花園中所造亭臺、樹沼。其稿樣圖式畫像等皆在內。

第四十四種可採食之草木

培植精緻之菜蔬。名圃所出之鮮菜。山藥、白菜、胡蘿蔔、白蘿蔔、菜根、酸菜、百合、麻菇、水芹等。併以上各種新鮮菜蔬。携入會中。以備攷察者。

第四十五種菓樹與菓子

各種花菓之名目與種類。特立樹與依壁樹。精緻菓園內所出各種鮮菓。每種携入數枚。以備比賽。如蘋果、生梨之可收菓汁者。櫻桃、李子、橘子、瓜屬與胡桃、核桃等。種園所有之別項出產。各選數種携入比賽。無論係特立樹所生。或依壁樹所生。其辦法皆同。特選菓之新出以前未見者。其種類須全備。

第四十六種大小樹木與花草之可爲裝飾者

可爲裝飾之樹。或連根者。或培養得法。漸能脫根者。再或舊根樹。或拴種樹。更有

各國寶星攷畧

寶山黃致堯伯申編譯

大清帝國

亞西亞東洲奉儒教兼崇釋道二教

寶星共十有一

頭等第一雙龍寶星 頭等寶星赤金地。瑤瑤雙龍中嵌珍珠一。雙龍中間鑿清文七字。注明等第。四角鑿雙龍寶星四字。式尙方。計營造尺長三寸三分。寬二寸二分。上有環首。以下同。金龍金紅色帶。頭二三等帶均長一尺三寸。寬一寸五分。兩頭有穗。絲繩束結。專贈各國之君。

頭等第二雙龍寶星 寶星中嵌紅寶石一。銀龍大紅色帶。給各國世子親王宗親國戚等。

頭等第三雙龍寶星 寶星中嵌光面珊瑚一。帶同第二。給各國世爵大臣總理各部務大臣頭等公使等。

二等第一雙龍寶星 寶星赤金地。銀雙龍中嵌起花珊瑚一。二等式尙圓。徑二寸七分。周圍均尖如意。頭八個。二三等寶星上下均鑿清文各三字。上首居中。鑿直行御賜二字。黃龍紫色帶。給各國二等公使等。

二等第二雙龍寶星 給各國二等公使。署理公使。總稅務司等。

三等第三雙龍寶星 給各國頭等參贊。武職大員。總領事官。總教習等。

三等第一雙龍寶星 寶星瑤瑯地金雙龍中嵌藍寶石一。三等式尙圓。周圍均圓。如意十四個。徑二寸五分。紅龍藍色帶。給各國三等參贊領事官。正使隨員。水師頭等管駕官。陸路副將。教習等。

二等第二雙龍寶星 給各國副領事官。水師二等管駕官。陸路參將等。

三等第三雙龍寶星 給各國繙譯官。遊擊。都司等。

四等雙龍寶星 寶星瑤瑯地銀雙龍中嵌青金石一。四五等均式尙圓。無稜。徑一寸九分。上鑿清文三字。下鑿清文二字。上面平行鑿御賜二字。綠龍醬色帶。四五等帶均長五寸。寬一寸一分。給各國兵弁等。

五等雙龍寶星 寶星銀地瑤瑯雙龍中嵌碑礫石一。徑一寸六分。藍龍月白帶。給各國工商人等。

按光緒七年十二月十九日。總理各國事務衙門奏定章程。頭等第一第二寶星。不用執照。由本衙門知照。各國外部大臣。分別轉贈移送。頭等第三以下。應用本衙門關防執照。前半恭錄允准釐定寶星之諭旨。後半填寫承領執照之人姓名。籍貫。叙明給予之故。暨給予之年月日。此後本人若有劣迹。經本國斥退者。仍將寶星執照。一律追繳。頒給頭二等寶星。奉旨後由本衙門製造。三等以下寶星。

逕由奏請頒給之處製造仍知照本衙門蓋用關防發給執照以備稽核光緒二十二年夏合肥李傅相奏請將寶星周圍改鑿星芒

歐羅巴洲教寶星一

耶路撒冷

猶太都城今隸土耳其東土

聖約翰至尊寶星

一千四十八年耶路撒冷立善院曰

聖約翰並置教寶星隸善院

一千一百十三年教皇

天主教皇駐意大里之羅馬都城耶穌教無之

巴士加

爾第二諭準此耶路撒冷聖約翰至尊寶星之所由祖也一千一百十八年杜坡衣

甫格

法人

之三子來蒙

一千一百二十一年繼法人在拉爾東為聖約翰寶星首領

改曰子爵教寶星一千一百二

十年教皇加里克士德第二諭準一千二百九年改聖約翰子爵曰羅德

爵

一千五百三十年改曰馬爾德

地中海島隸英

子爵自一千八百五年寶星首領郭爾多

痕

希臘地

人多馬西佛拉卒後至一千八百七十九年寶星會長會同羅馬教皇議事院

綜理寶星會一千八百七十九年三月二十八日仍復首領舊秩

案寶會原為留養病人貧民遊人進香教民而設第九紀西人自耶穌降生始每百年為一紀之末

西阿痕

地

之樂善人曰沙羅爾設善院於城中命名特拉士加拉寶星會之鼻祖

也寶星會本曰行善兄弟會尋曰耶路撒冷聖約翰子爵曰羅德子爵曰馬爾德

子爵一千九十九年在拉爾又名東法國馬爾的格島人率十字軍基利斯督教兵胸懸十字

年。至一千二百七十年。克耶路撒冷。立會於此。而自為首領。留養進香教民。並為

療病。一千一百二十一年。在拉爾。納杜坡衣來蒙。寶星會二之議。以兵衛教民。而

拒回教。故教寶星。並為武職寶星也。一千一百八十八年。撒拉憚。埃及復據耶路

撒冷。寶星會人亡。走聖約翰大克勒。又曰阿克勒。土耳其東土。尋走西卑勒。地中海。隸英。一千二百

十年。遷羅德。自是寶星會人。奮拒回民於此者二百餘年。一千五百二十二年。東

里蒙。第二回。會。克羅德。寶星會人走干地。又曰克來德。地中海。島。隸土。尋之西西勒。地中海。隸意。一千

五百三十年。日耳曼。歐中。帝國。皇查理甲。本曰查理。第五。以馬爾德。昇寶星會。遂居焉。故曰馬

爾德子爵。厥後土人時時攻島。一千五百六十五年。寶星會擊走土人。土故久憚

之一千七百九十八年。薄那巴爾德。即法皇。拿破崙。第一。興師埃及。阿非利加。北土。土途襲

馬爾德。首領哄卑。詩謝職。俄羅斯。見後。皇波爾第一。雖不奉天主教。而自為寶星會

保護。由是寶星會蓋祇名存實亡已。一千八百一年。寶星會遷加他痕。一千八百

二十六年。遷揮拉勒。二地。皆隸意。一千八百三十四年。遷羅馬。一千八百五十年。教民

復議立會於聖地。即耶路撒冷。歸教皇保護。專事行善。而議不果行。初馬爾德寶星會

分三等。曰子爵。與選者皆貴冑。曰經堂神甫。曰軍壯。家世清白。及不習機器及微

賤之行業技藝者充之。首領由子爵推舉。曰耶路撒冷。聖約翰聖院首領。居西歹

助款諸君姓氏續登 西冷居士助銀二十元

本館自刊書目

丙申年舊報一日起一期訖三十期合訂六册二元半
丁酉年舊報一册一元
丙申年舊報一册一元
丁酉年舊報一册一元
丙申年舊報一册一元
丁酉年舊報一册一元

每册一角八分 光緒會計錄 二册 三角
中國工商業 一册 二角
日本學校章程 三册 一角
隨報游記 二册 一角
氣學叢談 二册 一角

角半 日本學校章程 三册 一角
隨報游記 二册 一角
氣學叢談 二册 一角

上海時報自刊書目

如購本報每日每張取價十文外埠寄費每日每張不逾四角
凡報館及三馬路望平街均函示又本館除本館外寄在
四馬路惠福里游戲報館及三馬路望平街均函示又本館除本館外寄在
派處另開有單二凡惠函稿本報因限於篇幅多難全登例逐日分售各地
祈自給閱者諒行之專派前例加倍其紙張印刷等費另取洋銀四角
取費第一日每字取洋銀二釐五釐會告白每字取洋銀一元則以十式字面直加每行
按日每字取洋銀二釐五釐會告白每字取洋銀一元則以十式字面直加每行
另議行告白先以數百字類之為率多則以十式字面直加每行
字直行告白先以數百字類之為率多則以十式字面直加每行
日照行告白先以數百字類之為率多則以十式字面直加每行
事報館可也 五倍本報後附莊諧選錄及映中筆記均臨時撰成者故多新奇之務
資例請自給

事報館可也 五倍本報後附莊諧選錄及映中筆記均臨時撰成者故多新奇之務
資例請自給

時務日報館告白

之啓者本館現擬撰一各學堂學會表登諸報端所有各省新設
教習若干人董事司事若干人肄業生均祈詳細示知以便彙登此啓
費若干是否指撥公款抑係取資捐項均祈詳細示知以便彙登此啓

費若干是否指撥公款抑係取資捐項均祈詳細示知以便彙登此啓

新設英法各學堂

法文下午一點至四點鐘專課英文上午九點至十二點鐘專課
交三月以後每月除禮拜六及禮拜日外每夜七點鐘至十點鐘止每月先付
習英文或法文者除禮拜六及禮拜日外每夜七點鐘至十點鐘止每月先付

交三月以後每月除禮拜六及禮拜日外每夜七點鐘至十點鐘止每月先付
習英文或法文者除禮拜六及禮拜日外每夜七點鐘至十點鐘止每月先付

洋二仍元應收四本塾務期學有成凡來學先立一年合同如因事出開館未滿期一
 年者仍應收足一年備金五願學者請即至時務報館掛號俟擇定開館日期
 即行登報奉告日報館自出爾中此深歡惟是許頗有整給各款為數不諒
 時務報館啓者本館自出爾中此深歡惟是許頗有整給各款為數不諒

求是報館告白

將收而所收各款數目尚不開列於後祈讀者鑒之計開情形亦當為諸君子所共諒
 徐佩之洋四元五角收陳幼收嘉興陶宅洋四元一槓收洋裕元洋收徐元樓四角四分
 收吳誦芬洋七元五角收陳幼收嘉興陶宅洋四元一槓收洋裕元洋收徐元樓四角四分
 收常州陶宅洋四元五角收陳幼收嘉興陶宅洋四元一槓收洋裕元洋收徐元樓四角四分
 元收江左漢記電局拾六元收報館萊州程元小荷收洋四元館收常洋四元內收吳樓四角四分
 收元項梓收易洋雷放洋四元蘇湖收電報館萊州程元小荷收洋四元館收常洋四元內收吳樓四角四分
 四元項梓收易洋雷放洋四元蘇湖收電報館萊州程元小荷收洋四元館收常洋四元內收吳樓四角四分

吳縣令注洋五元收收時務報館收洋三元收謝元收南台元收楊洋收五元收朱收
 長洲令注洋五元收收時務報館收洋三元收謝元收南台元收楊洋收五元收朱收
 高洋一勃元威陶甫洋收蘇州嚴收洋四元舟收歐雲謝元收南台元收楊洋收五元收朱收
 收陶勃元威陶甫洋收蘇州嚴收洋四元舟收歐雲謝元收南台元收楊洋收五元收朱收
 洋四元勃元威陶甫洋收蘇州嚴收洋四元舟收歐雲謝元收南台元收楊洋收五元收朱收
 收四元勃元威陶甫洋收蘇州嚴收洋四元舟收歐雲謝元收南台元收楊洋收五元收朱收
 百六元勃元威陶甫洋收蘇州嚴收洋四元舟收歐雲謝元收南台元收楊洋收五元收朱收
 百六元勃元威陶甫洋收蘇州嚴收洋四元舟收歐雲謝元收南台元收楊洋收五元收朱收

杭州代派時務報館告白

仍至本宅定購時可也各籍報杭按城期代寄派到處九行曲送樓宅運白誤
 仍至本宅定購時可也各籍報杭按城期代寄派到處九行曲送樓宅運白誤
 仍至本宅定購時可也各籍報杭按城期代寄派到處九行曲送樓宅運白誤
 仍至本宅定購時可也各籍報杭按城期代寄派到處九行曲送樓宅運白誤

仍至本宅定購時可也各籍報杭按城期代寄派到處九行曲送樓宅運白誤
 仍至本宅定購時可也各籍報杭按城期代寄派到處九行曲送樓宅運白誤
 仍至本宅定購時可也各籍報杭按城期代寄派到處九行曲送樓宅運白誤
 仍至本宅定購時可也各籍報杭按城期代寄派到處九行曲送樓宅運白誤

